

ଫିଲିମୋନଙ୍କ ନିକଟକୁ ପାଉଲଙ୍କ ପତ୍ର ଫିଲିମୋନ୍‌ଙ୍କେ ବକେଡ଼ ପାଉଲ୍‌ତାଦ୍ ଚିଠି ଫିଲିମୋନ୍ ବଇ ବିଷୟରେ ଅଣ୍ଟୟ ପଦ୍

ଇସ୍ରାୟାଲ୍ ଫିଲିମୋନ୍ ବଇ ପ୍ରେରିତ୍ ପାଉଲ୍‌ତଡ଼ ଲେକ୍‌ତାଦ୍ ଆସ୍‌ମାଡ଼ତେ ୧:୧ । ବେସୁଟ୍ ଇଦ୍ ଲେକ୍‌ତଣ୍ଡ ଅଣ୍ଟ ଜେଲ୍‌ତାର୍ କାଏଦ୍ ଆସ୍ ମାଡ଼ତଣ୍ଡ, ବେନ୍ ଇଡ଼କେ ଆଦ୍‌ପାର୍‌ତେ ଅଣ୍ଟ ରୋମ୍‌ତାଗାଙ୍କ ଇଦ୍ ଲେକ୍‌ତଣ୍ଡ । ଯଦି ଅଣ୍ଟ ରୋମ୍‌ତାର୍ ମାଡ଼ତଣ୍ଡ କ୍ରିଷ୍ଟନ୍ ଜନମ୍‌ତେ ଗାରେଗାରେ ୬୧ ଏଣ୍ଟକ୍ ପେଡ଼କେ ଇଦ୍ ଚିଠି ଲେକିମାନ୍‌ତଣ୍ଡ । ଅଣ୍ଟ ଇଦ୍ ଚିଠି ଫିଲିମୋନ୍ ପେଦେରତେ ଝେରଣ୍ଡ ନାରୁଙ୍କ ଲେକ୍‌ତଣ୍ଡ । ଫିଲିମୋନ୍ ଝେରଣ୍ଡ ମଣ୍ଡଲିତେ ସବ୍ୟ ନୁ ଦାସଡ଼ କର୍ତ୍ତାଲ୍ ମାଡ଼ତଣ୍ଡ । ପାଉଲ୍ ଲେକ୍‌ତଣ୍ଡ ଯେ, ଅଣ୍ଟ ଅନିସିମସ୍‌ତିଙ୍କ ଦଣ୍ଡ ଇମାକିଡ଼, ବେନ କି ଫିଲିମୋନ୍‌ତାଗାଙ୍କ ଡଙ୍ଗା ମିକା ଜେକେ ମିରି ମାଡ଼ତଣ୍ଡ । ରୋମିୟ ନିୟମ୍ ଲେକାମ୍ ଫିଲିମୋନ୍ ଅନିସିମସ୍‌ତିଙ୍କ ଡଳାନ୍ ଦଣ୍ଡ ଇଦାନ୍ ଅଦିକାର୍ ମାଡ଼ତେ । ଅନିସିମସ୍‌ତିଙ୍କ କ୍ରିଷ୍ଟିୟାନ୍ ତାମୁଣ୍ଡ ଲେକେ ଗ୍ରହନ୍ ମାଡ଼ାନ୍ ସେଙ୍ଗେ ବେଲା ରାଜି ଆଦ୍‌ତଡ଼, ଆଦିନ୍‌ସେଙ୍ଗେ ଫିଲିମୋନ୍‌ତିଙ୍କ ଅନୁରୋଦ୍ ପାଉଲ୍ ଇଦୁତଣ୍ଡ । ପାଉଲ୍ ଅନିସିମସ୍‌ତିଙ୍କ ଅନ୍ ପଡ଼ୟେତାର୍ ସେବା ପାଡ଼ୟି ମାଡ଼ାନ୍ ସେଙ୍ଗେ ଗଟ୍ ଇଦାନ୍ ସେଙ୍ଗେ ପରାମର୍ଶ ଇଡ଼ତନ୍ ୧:୧୩-୧୪ ।

ବଇଡ଼ ଲୋପେ ମାନ୍ଦାନ୍ ମୁକ୍ୟ ବିଷୟ

୧. ପାଉଲ୍ ଫିଲିମୋନ୍‌ତିଙ୍କ ନମସ୍କାର୍ ମାଡ଼ତୁଣ୍ଡ । ୧:୧-୩
୨. ପାଉଲ୍ ଅନିସିମସ୍‌ତାଗାଙ୍କ ଫିଲିମୋନ୍‌ତିଙ୍କ ଝେରଣ୍ଡ କ୍ରିଷ୍ଟିୟାନ୍ ତାମୁଣ୍ଡ ଲେକେ ଗ୍ରହନ୍ ମାଡ଼ାନ୍ କେଡିତଣ୍ଡ । ୧:୪-୨୧
୩. ପାଉଲ୍ ତାନ୍ ମେଣ୍ଡଅନ୍‌ଦାମ୍ ଆଦାନ୍ ବିଷୟରେ ମୁନେତାଦ୍ ଗଟ୍ କେଡ଼ତଣ୍ଡ ନୁ ନମସ୍କାର୍ ମାଡ଼ି ତେରସ୍ତିତଣ୍ଡ । ୧:୨୨-୨୫

^୧ ଜିସୁ କ୍ରିଷ୍ଟଟନ୍ ସେଙ୍ଗେ କାୟିଦ୍ ଆସ୍‌ମାନ୍ଦାନ୍ ନାନ୍ ପାଉଲ୍, ନୁ

ମାନ ଦାଦାଲ୍ ତିମତିନାଗାଙ୍କୁ, ତାନ୍ ପ୍ରିୟ ସାଙ୍ଗ ନୁ ଅନ୍ ତତ୍ ପାଡ଼ନ୍ତି
ମାଡ଼ାନଣ୍ଡ ପିଲିମନ୍,

୨ ☆ ତାମ୍ ଲୋନ୍ ଗୁଡ଼ମାନ୍ଦାନ୍ ମଣ୍ଡଲିତେ ନାରୁଡ଼, ଏଲାଡ଼ ଅପ୍ପିୟା
ନୁ ସହ ସୈନିକ ଅକିପ୍ପନ୍ ଗାରରେ ଚିଟି ।

୩ ବାବାଲ୍ ନୁ ପ୍ରବୁ ଜିସୁ କ୍ରିଷ୍ଟ ମିକିଂଙ୍କ ଦୟା ନୁ ଗାନ୍ତି ଇଞ୍ଜିଣ୍ଡ ।

ପିଲିମନ୍ତେ ପ୍ରେମ ନୁ ବିଶ୍ୱାସ

୪ ଦାଦାଲ୍ ଫିଲିମନ୍, ସାରେଦାମ୍ ନାନ୍ ପ୍ରାର୍ଥନା ମାଡ଼ାନ୍ ଖେଲେ
ନିକିଂଙ୍କ ଏକା ମାଡ଼ି ଇଶ୍ୱରତିଙ୍କ ଦନ୍ୟବାଦ୍ ଇଦ୍ତାନ୍,

୫ ବାତେଙ୍କ ଇଡ଼କେ ନାନ୍ କେଞ୍ଜିତାନ୍, ପ୍ରବୁ ଜିସୁନାଗ୍ ନିୟାଦ୍
ବିଶ୍ୱାସ ନୁ ଇଶ୍ୱର ବକ୍ତି ନାରୁଡ଼କିଂଙ୍କ ନିୟାଦ୍ ବେସର୍ ପ୍ରେମ ମିନ୍ଦେ
!

୬ କ୍ରିଷ୍ଟଟନ୍ ତତ୍ କାୟଲି ମାମମେ ଜିଞ୍ଜୁଣ୍ଡାଗ୍ ବେନ୍ ସାରେ
ଆର୍ଗିବାଦ୍ ପାଏମ୍ ଆଡ଼ତମ୍, କ୍ରିଷ୍ଟ ବିଶ୍ୱାସି ଲେକାମ୍ ନିତଡ଼ ମାୟାଦ୍
କାଈଲାନ୍ଦା ଲୋପେଡ଼ ବିଷୟ ସାୟେ ବୁଜେମ୍ ଆଦାନ୍ ସେଙ୍ଗେ
ନିକିଂଙ୍କ ସାହାୟ୍ୟ ମାଡ଼ି, ଇଦ୍ ନାନ୍ ପ୍ରାର୍ଥନା ମାଡ଼ୁତାନ୍ ।

୭ ହୋ ଦାଦା, ନିୟାଦ୍ ପ୍ରେମ ନାକିଂଙ୍କ ଗାଟି ଖେଡ଼କ୍ ମାଡ଼ତେ
ନୁ ଉସାଈଡ଼ ମିକା ମାଡ଼ତେ; ବାତେଙ୍କ ଇଡ଼କେ ନିମ୍ ଇଶ୍ୱରତେ
ନାରୁଡ଼ତେ ହୃଦୟତିଙ୍କ ଖେଡ଼କ୍ ମାଡ଼ତି ।

ପାଉଲ୍ ଅନିସିମସ୍ ସେଙ୍ଗେ ଅନୁରଦ୍ ମାଡ଼ତଣ୍ଡ

୮ ଆଦିଙ୍କ କ୍ରିଷ୍ଟ ବିଶ୍ୱାସି ତାମୁଣ୍ଡ ଇନା ନିୟାଦ୍ କର୍ତ୍ତବ୍ୟ ବିଷୟ
ନିର୍ଦ୍ଦେଶ୍ ଇଦାନଙ୍କ ନାୟାଦ୍ ସାଆସ୍ ମିନ୍ଦେ ।

୯ ଇଡ଼କେ ନି ପର୍ବର ନାୟାଦ୍ ପ୍ରେମ ମାନ୍ଦାନ୍ ମାୟଦିଙ୍କ ଅନୁରଦ୍
କେ ମାଡ଼ିତାନ୍ । ଯଦିବା ନାନ୍ ପାଉଲ୍, ଖେରଣ୍ଡ ପେଦ୍‌ଝାଲ୍, ଜିସୁ
କ୍ରିଷ୍ଟଟନ୍ ସେଙ୍ଗେ ଇଞ୍ଜେ ବନ୍ଦି ଆଡ଼ତାନ୍ ।

୧୦ ☆ ନାନ୍ କେଡୁତାନ୍, ଇଗେ ବନ୍ଦି ମାନ୍ଦାନ୍ ଖେଲେ ନାନ୍ ବେନଙ୍କ
କ୍ରିଷ୍ଟଟନ୍ ସେଙ୍ଗେ ନିଜେଡ଼ ମାର୍ ଇନା ପାଏମ୍ ଆଡ଼ତାନ୍, ନୁ ନାନ୍ ଅନ୍
ଆମ୍ବାତେ ବାବାଲ୍ ଲେକାମ୍ ଆଡ଼ତାନ୍, ଆଦ୍ ଅନିସିମସ୍ ମାୟଦିଙ୍କ
ନାନ୍ ଇଦ୍ ଅନୁରଦ୍ ମାଡ଼ୁତାନ୍ ।

୧୧ ଅନ୍ଦିନେ ଅନିସିମସ୍ ନିକିଂଙ୍କ ଦରକାର ଇଲ୍‌ଝେ ମାଡ଼ତଣ୍ଡ, ବାତେଙ୍କ ଇଡ଼କେ ଇଞ୍ଜେ ଅଣ୍ଡ ନିକିଂଙ୍କ ନୁ ନାକିଂଙ୍କ ଗାଟି ଦରକାର ଆଦତନ୍ ।

୧୨ ଅଣ୍ଡ ନା ଜିଝୁଣ୍ଡ ଲେକାମ୍ ନାନ୍ ଅଂକିଙ୍କ ମିଇ ବକେଡ଼ ନୁ ମାଲ୍‌ପି ରଅଡୁତାନ୍ ।

୧୩ ସୁସମାଚାର ସେଙ୍ଗେ ବନ୍ଦି ଇସାବତେ ଅଂକିଙ୍କ ନା ସେବା ମାଡାନଙ୍କ ଗାରେ ନେଃଏତାନଙ୍କ ମାନ୍ ଆସ୍‌ସ ମାଡ଼ତେ ।

୧୪ ଇଦ୍ ଲେକେଡ଼ ବିଷୟତିଙ୍କ ରାଜି ମାଡାନ ସେଙ୍ଗେ ନାନ୍ ନିକିଂଙ୍କ କେଲନ୍ ଯଦି ନିୟାଦ୍ ମାନ୍ ମିନ୍ଦେ ଆଲେକେ ନିମ୍ ରାଜି ଆୟମା । ଆଦ୍ ବାଡ଼ଆଇ ନି ଗଟ୍ ଝିଡ଼ସି ନାନ୍ ବାଡ଼ ମାଡ଼ନ୍ ।

୧୫ ସାରେ ଦିନା ନିୟାଗ୍ ମାନ୍‌ତଣ୍ଡ ଇଞ୍ଜ, ଅନିସିମସ୍ ବେସକ୍ ଦିନାଡ଼ ମାୟଦିଙ୍କ ନିକିଂଙ୍କ ଝିଡ଼ସି ଆଞ୍ଜ ମାଡ଼ତଣ୍ଡ ।

୧୬ ଏକା ମାଡେ, ଅଣ୍ଡ ଇଞ୍ଜେ କ୍ରିତଦାସ୍ ଆୟୟଣ୍ଡ । କ୍ରିଷ୍ଟଟନ୍ ବିଶ୍ୱାସି ଲେକାମ୍ ଅଣ୍ଡ ଇଞ୍ଜେ ମାନ୍ ପ୍ରିୟ ତାମୁଣ୍ଡ । ନା କଣ୍ଡେତାଗ୍ ଅଣ୍ଡ ବେସର୍ ଉପକାର ! ନିକିଂଙ୍କ ଅଡ଼ତୁଣ୍ଡ ଦାସ ନୁ କ୍ରିଷ୍ଟ ବିଶ୍ୱାସି ତାମୁଣ୍ଡ ଇନା ଅଣ୍ଡ ନି ସେଙ୍ଗେ ମେଣ୍ଡେ ବେସର୍ ଉପକାର ଆୟୟଣ୍ଡ !

୧୭ ଯଦି ନିମ୍ ନାକିଂଙ୍କ ନି ତଡ଼୍‌ମାୟାନଣ୍ଡ ଇଞ୍ଜ ଆଲ୍‌ସୁଡିନ୍, ନାକିଂଙ୍କ ବେଲା ସ୍ୱାଗଡ଼ ମାଡେନି, ଅଂକିଙ୍କ ଆଦେ ପୁଟୁଙ୍କ ମାଡେ ।

୧୮ ଅଣ୍ଡ ଯଦି ନିକିଂଙ୍କ ବାଡ଼ ଯତି ମାଡ଼ିମାନ୍‌ତଣ୍ଡ କି ନିକିଂଙ୍କ ଅଣ୍ଡ ବାଡ଼ ଇଦାନ୍ ମାନ୍‌ତେ, ଆଲେକେ ଆଦ୍ ନା ଇସାବତାଗ୍ ଲେକିଇମ୍ ।

୧୯ ଇଦ୍ ଉଡେ, ନାନ୍ ନିଜେଡ଼ କାୟଦେ ଲେକୁତାନ୍; ନାନ୍, ପାଉଲ୍, ନିଜାମ୍ ଆଦ୍ କାରେ ଦେଃଡିତାନ୍ । ଆଲେକ୍‌ବା ନିକିଂଙ୍କ ନାନ୍ ଏକା ମାଡାନାଦ୍ ଇଲ୍‌ଝେମାଡ଼ତେ, ନିୟାଦ୍ ଲୋପେଡ଼ ଆମ୍ ସେଙ୍ଗେ ମିକା ନିମ୍ ନାୟାଗ୍ ରଣ୍ ।

୨୦ ଆଦିଙ୍କ ତାମୁ ! ନା ଲେକେ ଝେରଣ୍ଡ କ୍ରିଷ୍ଟ ବିଶ୍ୱାସି ତାମୁଙ୍କ ପ୍ରବୁନ୍ ସେଙ୍ଗେ ଅନୁଗ୍ରହ ମାଡେ, ଇଲା ମାଡ଼କେ ନାନ୍ ଗାଟି ଝେଡ଼କିତାନ୍ ।

୨୧ ନିମ୍ ନାୟାଦ୍ ଅନୁରଦ୍ ନେଃଡିତି ଇଞ୍ଜ ପୁଞ୍ଜ, ନାନ୍ ଇଦ୍ ଚିଟି ଲେକୁତାନ୍ । ନାନ୍ ପୁଡ଼ତାନ୍, ନିୟାଗାଙ୍କ ନାନ୍ ବେସର୍ ଆଗେ ମାଡ଼ତୁନ୍, ନିମ୍ ନାୟାଗାଙ୍କ ମେଣ୍ଡେ ଅଦିକ୍ ଆଗେ ମାଡ଼ିତିନ୍ ।

୨୨ ଇଦିନ୍ ତଡ଼୍ ନାୟାଦ୍ ମେଣ୍ଡେ ଅଣ୍ଡୟ୍ ଅନୁରଦ୍, ଆଗେ ନା
ମାୟ୍ଦିଙ୍କ୍ ଅଣ୍ଡୟ୍ ବାକ୍ତେ ତିଆର୍ ମାଡ଼ି ନେଃମ୍ । ନାୟାଦ୍ ଆଗେ
ମିନ୍ଦେ, ମିଡ଼୍ ପ୍ରାର୍ତ୍ତନା ମାଡ଼କେ ନାନ୍ ମିଇ ବକେଡ଼୍ ମାଲ୍ସ୍ ଝାଦ୍ତାନ୍
।

ମାଡେଙ୍କ୍ତାଦ୍ ନମସ୍କାର୍

୨୩ ☆ କ୍ରିଷ୍ଟଚନ୍ ସେଙ୍ଗେ ନା ତଡ଼୍ କାୟ୍ଦି ମାନ୍ଦାନଣ୍ଡ୍ ଏପାପ୍ରା ମିକିଂଙ୍କ୍
ନମସ୍କାର୍ ମାଡ଼ତୁଣ୍ଡ୍ ।

୨୪ ☆ ମେଣ୍ଡେ ନା ତଡ଼୍ ପାଡ଼୍ଯି ମାଡ଼ାନଡ଼ି ମାର୍କ୍, ଆରିସ୍ତାର୍କ୍, ଦୀମା ନୁ
ଲୁକ ମିକା ମିକିଂଙ୍କ୍ ନସ୍କାର୍ ମାଡ଼ତୁଣ୍ଡ୍ ।

୨୫ ପ୍ରବୁ ଜିସୁ କ୍ରିଷ୍ଟଚନ୍ ଅନୁଗ୍ରହ ମିଇ ସାରେତଡ଼୍ ତଡ଼୍ ମାନି ।
ଆମେନ୍ ।

☆ **୧:୨୩** କଲସୀୟ ୧:୭; ୪:୧୨. ☆ **୧:୨୪** ପ୍ରେରିତ ୧୨:୧୨, ୨୫; ୧୩:୧୩; ୧୫:୩୭-୩୯;
କଲସୀୟ ୪:୧୦; ପ୍ରେରିତ ୧୯:୨୯; ୨୭:୨; କଲସୀୟ ୪:୧୦; କଲସୀୟ ୪:୧୪; ୨ ତୀମତି
୪:୧୦; କଲସୀୟ ୪:୧୪; ୨ ତୀମତି ୪:୧୧.

ପୁନାବ୍ ଆର୍ବ୍

The New Testament in the Koya language of India:

ପୁନାବ୍ ଆର୍ବ୍ (Bible)

copyright © 2020 The Word for the World International and Koya Translation Samithi, Malkangiri, Odisha

Language: (Koya)

Contributor: The Word for the World South Asia

ପୁନାବ୍ ଆର୍ବ୍

ପୁନାବ୍ ନିୟମ୍, 2020

The New Testament in Koya Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

72ff5787-bb80-584b-a1a0-0acd8a2fefae